

- 44 -

Na osnovu člana 11. Zakona o komunalnim djelatnostima («Službene novine Zeničko-dobojskog kantona», broj 17/08) i člana 25. Statuta Općine Zavidovići («Službeni glasnik Općine Zavidovići», broj 5/08 i 5a/08), Općinsko vijeće Zavidovići, na 18.sjednici održanoj dana 30.01.2010.godine, donosi

O D L U K U

o standardima komunalnih usluga

Član 1.

Ovom Odlukom utvrđuju se standardi vršenja usluga individualne i zajedničke komunalne potrošnje na općini Zavidovići, za 2010. godinu.

Član 2.

Uslugama individualne i zajedničke komunalne potrošnje u smislu ove Odluke, smatraju se:

- suho čišćenje i pranje javnih površina
- zimska služba
- održavanje i uređivanje javnih zelenih površina
- odvođenje atmosferskih voda
- održavanje javne rasvjete
- dekorisanje
- proizvodnja i isporuka vode za piće
- gradsko centralno grijanje
- odvoz otpada

Član 3.

Standardi vršenja usluga individualne i zajedničke komunalne potrošnje utvrđuju se kako slijedi:

SUHO ČIŠĆENJE I PRANJE JAVNIH POVRŠINA

Suho čišćenje javnih saobraćajnih i zelenih površina vrši se u periodu od 01.01.2010. do 31.12.2010. godine.

Otpad koji se uklanja sa javnih saobraćajnih i zelenih površina bliže je definisan Programom finansiranja komunalnih djelatnosti za 2010. godinu (dalje u tekstu «Program»), tačka 1. Čišćenje i pranje javnih saobraćajnih površina u naselju, podtačke 1, 2, 3. i 4.

Javne saobraćajne i zelene površine obuhvataju ulice, zelene površine, kao i ostale površine navedene u Programu.

Suho čišćenje ulica se vrši dinamikom utvrđenom Programom, tačka 1, podtačka a) Suho čišćenje javnih površina, trgova, ulica, parkinga, trotoara, od 01.01.2010. do 31.12.2010. godine.

Pranje javnih površina obavljat će se mašinski (auto-cisternom). Pranje javnih saobraćajnih površina i pješačkih površina vršiće se u periodu od 01.04. 2010. do 30.09.2010. godine.

Ukoliko se ukaže potreba, moguća su i vanredna pranja ulica, što će biti definisano nalogom koji izdaje Općinski načelnik.

ZIMSKA SLUŽBA

Pod zimskom službom podrazumijevaju se radovi neophodni za održavanje prohodnosti ulica, trotoara, trgova, mostova i drugih saobraćajnih javnih površina za režim saobraćaja u zimskim uslovima.

Za neometano izvođenje zimske službe, bez većih zastoja saobraćaja, potrebno je pripremiti sljedeće:

- a) obezbijediti dovoljnu količinu sredstava za posipanje,
- b) osposobiti svu potrebnu mehanizaciju, opremu i specijalne zimske mašine za rad u zimskoj službi,
- c) pripremiti i opremiti ulice sa odgovarajućom zimskom signalizacijom i opremom,
- d) organizovati pravovremeno obavješćavanje korisnika ulica preko sredstava javnog informisanja.

- Odstranjivanje snijega sa kolovoznih površina, trotoara i drugih površina počinje pravovremeno, tako da visina snijega na cestama svih prioriteta (I, II i III prioritet) ne prelazi 5 cm, a saobraćaj je moguć uz upotrebu zimske opreme vozila.

- Čišćenje se vrši odlaganjem snijega na bankinama (ukoliko postoje), a za ulice sa trotoarima, snijeg se ne smije odlagati na iste, niti na parking uz ulice, pješačke i druge površine, nego se mora utovariti u vozila i odvoziti na deponiju.

- Radovi nakon prestanka oborina obuhvataju proširenje očišćenog kolovoza, ručno čišćenje mostova i propusta, čišćenje raskršća, čišćenje saobraćajne signalizacije, autobuskih stajališta, čišćenje parkirališta, trotoara, stepeništa i drugih površina.

- Radi sprječavanja nastanka poledice dežurne ekipe će stalno nadzirati stanje kolovoza ulica, trotoara i ostalih površina, posebno kritičnijih sekcija, koje su kao takve već iskustveno poznate. To važi prije svega za oštre krivine, veće kosine, mostove, sjenovite odsjeke, raskršća i mjesta, gdje teče voda sa prilaznih cesta, voda sa kosina, bermi i rigola. Takva mjesta će se posipati preventivno, odnosno odmah, kada se na kolovozu uoči pojava poledice. Iz navedenih razloga vršiće se preventivno posipanje, već pri dovoljnoj vjerovatnoći nastanka poledice. To važi za sve prioritete.

- Materijali za posipanje će biti na zalihi prije početka sezone zimske službe, najmanje u količini od 30% od ukupne procjene potrebnih materijala. Dostava preostalog materijala će se usklađivati sa potrebama tokom trajanja zimske službe.

Sprječavanje klizavosti kolovoza vrši se posipanjem mješavine soli i kamenog agregata.

Posipanje se vrši kamionom sa posipačem, a posipa se samo traka širine 2 m i to po osi kolnika, a u količini od cca 150 kg soli/km kolovoza i 0,10 m³/km agregata. Posipaju se isključivo asfaltirani kolovozi, trotoari i druge površine, a makadamske samo ako postoji opravdana potreba. Ukoliko se ne postignu željeni efekti u jednom prolazu, vrši se naknadno posipanje cijele dionice ili samo zavoja, mostova, uspona i raskršća na određenoj dionici ulice.

Pješačke površine s kamenom ili betonskom podlogom posipaće se odgovarajućim sredstvom za ove materijale.

Prioriteti intervencija su definirani Programom.

Nadzor nad stanjem prohodnosti je organizovan u okviru vršenja nadzora kojeg obavlja nadzorni organ, a koji dnevno po planu pregledava ulice i druge površine i o tome obavješćava dežurne u zimskoj službi. Prema potrebi će se obavljati i eventualni manji poslovi za uspostavljanje sigurnog i tekućeg saobraćaja (uređenje odvodnje, odstranjivanje snijega i poledice ručno, davanje zahtjeva za isključivanje vozila na cestama u vanrednim prilikama).

Svaka aktivnost i djelovanje zimske službe će biti evidentirana u dnevniku zimske službe koji potpisuje rukovodilac zimske službe i nadzorni organ, u svojstvu odgovornog lica investitora.

Na temelju podataka iz dnevnika vrši se plaćanje tranši zimskog održavanja. Za utvrđene manjkavosti u funkcioniranju zimske službe, koje se ne otklone u roku koji naloži nadzorni organ, naplaćuju se penali odbijanjem od mjesečne tranše za zimsku službu, za taj mjesec, u iznosu od 10% od vrijednosti tranše.

Trajanje zimske službe se utvrđuje u III faze, kako je definirano Programom.

Ulice i ostale površine, koje su obuhvaćene zimskom službom definirane su Programom finansiranja komunalnih djelatnosti i Odlukom o određivanju naziva ulica, trgova, mostova i drugih građevina («Službeni glasnik Općine Zavidovići» broj 4/2008).

ODRŽAVANJE I UREĐIVANJE JAVNIH ZELENIH POVRŠINA

Pod održavanjem i uređivanjem javnih zelenih površina podrazumijeva se čišćenje, košenje i sakupljanje trave i otpada s javnih zelenih površina, obnova, održavanje i njega drveća, održavanje i obrezivanje ukrasnog grmlja i živice, održavanje i njega sezonskih i trajnih cvjetnjaka, održavanje sipinjenih površina dječijih igrališta, održavanje opreme na dječijim igralištima, fitosanitetska zaštita bilja, proizvodnja komposta i biljnog materijala za potrebe održavanja, nabavka, sađenje i održavanje sezonskog cvijeća i trajnica, deponiranje sakupljenog otpada, kao i ostali poslovi strukovno potrebni za održavanje javnog zelenila.

Javne zelene površine će se održavati i uređivati u skladu sa Programom finansiranja komunalnih djelatnosti.

Košenje ovih površina obavljaće se mašinski, uz istovremeno kupljenje i odvoženje pokošene trave na privremenu deponiju unutar zelene površine koja će se po završetku košenja odmah odvesti na deponiju (kontejner).

ODVOĐENJE ATMOSFERSKIH VODA

Za normalno funkcioniranje saobraćaja u naseljenim mjestima, a iz razloga zaštite asfaltnih zastora na gradskim ulicama, potrebno je održavati oborinsku kanalizaciju tokom cijele godine.

Odvodnja atmosferskih voda obuhvaća slijedeći obim radova nužno potreban za urbani dio općine Zavidovići:

- popravak revizionih okana, tijela slivnika i spojeva slivnika na kanalizaciju
- podizanje okvira i namještanje poklopca,
- čišćenje slivnika, taložnika i spoja slivnika na kanalizaciju, vađenje taloga i odvoz na deponiju,
- zamjena dotrajalih LŽ poklopaca ili rešetki na revizionim oknima ili slivnicima,
- ugradnja oštećenih slivnika i rešetki na području grada vršiće se po potrebi i nalogu Općinskog načelnika, a u skladu sa raspoloživim sredstvima.

ODRŽAVANJE JAVNE RASVJETE

Pod pojmom "održavanje javne rasvjete" podrazumijeva se upravljanje i održavanje objekata i uređaja javne rasvjete, što uključuje i podmirivanje troškova električne energije za osvjetljavanje javnih površina, ulica, cesta koje prolaze kroz naselje i nekategorisanih cesta

Održavanje javne rasvjete vršiće se na način da će se neophodne intervencije, u smislu izmjene sijalica, svjetiljki, prigušnica, kablova i ostalog potrošnog materijala i sl. izvršiti najkasnije u roku od 7 (sedam) dana.

DEKORISANJE

Prilikom državnih, općinskih i vjerskih praznika, te određenih manifestacija, vršiće se prigodno dekorisanje zastavicama, transparentima i svijetlećim ukrasima.

Vrsta ukrasa, način i mjesto postavljanja određiće se posebnim Programom dekoracije grada, koju do kraja januara, a za tekuću godinu, donosi služba nadležna za komunalne poslove.

Prilikom sačinjavanja Programa vodiće se računa o slijedećim smjernicama:

Uskladiti sve primijenjene dekorativne elemente u pogledu boja, što se naročito odnosi na svjetlosne efekte.

U okviru predviđenih sredstava za nabavku nove dekorativne opreme primijeniti slijedeće elemente:

- ukrašavanje krošnji drveća
- viseći svjetleći ukrasi (za premoste ulica)
- postavljanje dekorativnih iluminacijskih elemenata na stubove javne rasvjete
- koristiti postojeću dekorativnu opremu uz uslov da se svi svjetleći elementi koji nisu u funkciji zamijene ispravnima
- svi nabrojani iluminacijski elementi i oprema moraju udovoljavati tehničkim normama i standardima, te kao takve biti ugrađene na propisan način

PROIZVODNJA I ISPORUKA VODE ZA PIĆE

Obavezno je obezbjeđenje pretpostavki za kontinuirano snabdijevanje pitkom vodom tokom cijele godine.

Pritisak u cijevima mora zadovoljavati standarde na način da je omogućen normalan pritisak koji obezbjeđuje normalno korištenje kućanskih aparata i sanitarnih uređaja na svim visinskim tačkama isporuke.

Ispravnost vode će se redovno kontrolisati i o rezultatima nalaza obavještavati javnost. Kontinuirano raditi na poboljšanju uslova isporuke, kao i kvaliteta isporučene vode za piće.

GRADSKO CENTRALNO GRIJANJE

Grijna sezona traje u periodu od 15.10. 2009. godine do 15.04. 2010. godine.

Ukoliko su vanjske temperature 12° C ili niže kroz tri uzastopna dana mjerena u Zavidovićima u 21,00 h, grijanje će početi 01.10. ili produžiti poslije 15.04., uz obračun i ispostavu računa i za taj period.

Tokom grejne sezone, davalac usluga je obavezan da u intervalu od 6,00 do 22,00 sati u prostorijama potrošača obezbijedi temperaturu od +18 °C u sredini prostorije na visini od 1,5 m od poda, pod uslovom da je instalacija ispravna, pravilno dimenzionisana, izregulisana i ako je objekat izgrađen i održavan u skladu sa standardima za potrošače kod kojih se ne vrši obračun utroška toplotne energije, sa noćnim prekidom grijanja od 22,00 h do 06.00 h.“

ODVOZ OTPADA

Za odlaganje otpada obezbjeđuju su posude za odlaganje: kontejneri, kante od 80 l, PVC kese i druge prikladne posude.

Odvoz otpada se vrši na način definiran Odlukom o komunalnom redu, kada je u pitanju učestalost odvoza tj. najmanje tri puta sedmično, a po potrebi i češće.

Glomazni otpad će se voziti jednom sedmično, u skladu sa uslovima propisanim Odlukom.

Kontinuirano raditi na proširenju područja obuhvaćenog selektivnim prikupljanjem otpada.

Član 4.

Ova Odluka stupa na snagu danom objavljivanja u „Službenom glasniku Općine Zavidovićí“, a primjenjuje se od 01.01.2010.godine.

OPĆINA ZAVIDOVIĆI
OPĆINSKO VIJEĆE

PREDSJEDAVAJUĆI
OPĆINSKOG VIJEĆA

Broj: 01-23-5356/09

Datum: 30.01.2010. godine

(M.P.)

ing. Radosav Petrović, s.r.